

Қазақстан Республикасы
Үкіметінің
2025 жылғы « 2 » мамырдағы
№ 303 қаулысымен
бекітілген

**Ұлттық әл-ауқат қорының борыштық бағалы қағаздарын сатып алу
арқылы Қазақстан Республикасы Ұлттық қорының қаражаты есебінен
қаржыландыруға ұсынылатын жалпы ел үшін маңызы бар жобаларға
сараптама жүргізу, сондай-ақ осындай жобаларды қаржыландырудың
балама көздерінің бар-жоғын қарау
қағидалары**

1-тарау. Жалпы ережелер

1. Осы Ұлттық әл-ауқат қорының борыштық бағалы қағаздарын сатып алу арқылы Қазақстан Республикасы Ұлттық қорының (бұдан әрі – ҚРҰҚ) қаражаты есебінен қаржыландыруға ұсынылатын жалпы ел үшін маңызы бар жобаларға сараптама жүргізу, сондай-ақ осындай жобаларды қаржыландырудың балама көздерінің бар-жоғын қарау қағидалары (бұдан әрі – Қағидалар) Қазақстан Республикасы Бюджет кодексінің 59-бабының 3-тармағына сәйкес әзірленді және Ұлттық әл-ауқат қорының борыштық бағалы қағаздарын (бұдан әрі – борыштық бағалы қағаздар) сатып алу арқылы ҚРҰҚ қаражаты есебінен қаржыландыруға ұсынылатын жалпы ел үшін маңызы бар жобаларға сараптама жүргізу және қаржыландырудың балама көздерінің бар-жоғын қарау тәртібін айқындайды.

2. Осы Қағидалардың мақсаты борыштық бағалы қағаздарды сатып алу арқылы ҚРҰҚ қаражаты есебінен қаржыландыруға ұсынылатын жобалардың ашық әрі жан-жақты сараптамасын қамтамасыз ету болып табылады.

Ашық әрі жан-жақты сараптама көрсетілген жобалардың жалпы ел үшін маңызы мен стратегиялық маңыздылығын, инвестициялық тиімділігі мен тартымдылығын сапалы бағалауға, ҚРҰҚ-дан қаржыландыру алатын ұйымдардың кредит қабілеттілігін бағалауға қол жеткізуге, қаржыландырудың балама көздерінің бар-жоғын қарауды, сондай-ақ Қазақстан Республикасы Президентінің 2022 жылғы 10 қыркүйектегі № 1005 Жарлығымен бекітілген Қазақстан Республикасының мемлекеттік қаржысын басқарудың 2030 жылға дейінгі тұжырымдамасының (бұдан әрі – Тұжырымдама) 5-бөлімінің 5.3-тармағында көзделген қағидалар мен шарттарды ескере отырып, қаржыландырудың оңтайлы құрылымы мен шарттарын тұжырымдауға бағытталған.

3. Осы Қағидаларда мынадай ұғымдар пайдаланылады:

1) жоба – борыштық бағалы қағаздарды сатып алу арқылы ҚРҰҚ қаражаты есебінен ішінара қаржыландыруға ұсынылатын және (немесе) ішінара қаржыландырылатын жалпы ел үшін маңызы бар инвестициялық жоба;

2) жобаның бақылау нүктелері – жобаның іске асырылуын бақылау пункттері, олар жобаны қаржыландыру кезеңдерінің арасында белгіленеді және Қазақстан Республикасының Ұлттық қорын басқару жөніндегі кеңес (бұдан әрі – ҰҚБК) отырысының хаттамасымен бекітіледі, жобаны іске асыру бойынша қаржыландырудың игерілу барысын және жоспарлы көрсеткіштерге (сандық көрсеткіштерге) қол жеткізілуін қадағалауға мүмкіндік береді;

3) жобаның бақылау нүктелерін талдау – бөлінген қаржыландырудың игерілуін талдау, сондай-ақ жобаның бақылау нүктелерінде жобаны іске асыру бойынша жоспарлы және іс жүзіндегі (сандық) көрсеткіштерді салыстырып тексеру және талдау;

4) жобаның бастамашысы – борыштық бағалы қағаздарды сатып алу арқылы ҚРҰҚ қаражаты есебінен ішінара қаржыландыруға ұсынылатын немесе ішінара қаржыландырылатын жобаны іске асыруға жауапты заңды тұлға (Қазақстан Республикасының резиденті);

5) жобаны индикативтік бағалау – жобаны пысықтау және жобаны қаржыландырудың индикативтік шарттарын қалыптастыру бойынша ұсынымдар беру мақсатында жан-жақты талдау (кредиттік және инвестициялық талдауды қоса алғанда) негізінде жобаны кешенді бағалаудың басында жүргізілетін жобаны алдын ала бағалау;

6) жобаны кешенді бағалау – жобаны индикативтік және қорытынды бағалаудан тұратын жан-жақты бағалау, ол жобаны ҚРҰҚ-дан қаржыландырудың мүмкіндігі мен орындылығын айқындау, сондай-ақ жобаның анықталған тәуекелдерін ескере отырып, жобаны қаржыландырудың оңтайлы шарттарын айқындау мақсатында жүргізіледі;

7) жобаны қорытынды бағалау – пысықталғанынан кейін және жан-жақты талдау (кредиттік және инвестициялық талдауды қоса алғанда) негізінде қаржыландырудың балама көздерін қарау қорытындылары бойынша жобаны кешенді бағалаудың соңында жүргізілетін жобаны бағалау;

8) жобаны стратегиялық бағалау – елдің әлеуметтік-экономикалық дамуы үшін жобаның жалпы ел үшін маңызы мен стратегиялық маңыздылығын айқындау мақсатында жобаны бағалау және талдау;

9) қарыз алушы – жобаны іске асыру мақсатында ҚРҰҚ қаражатынан облигациялық қарыз алатын заңды тұлға (Қазақстан Республикасының резиденті);

10) сараптама тобы – мақсаттары, міндеттері, функциялары мен құрамы осы Қағидаларға 1-қосымшаға сәйкес сараптама тобы туралы ережеде айқындалатын ұйымдар тобы;

11) сараптама тобына қатысушы – сараптама тобының құрамына кіретін ұйым;

12) сараптама тобын үйлестіруші орган – Қазақстан Республикасының

Ұлттық Банкі (бұдан әрі – ҚРҰБ);

13) тәуелсіз сараптама – тәуелсіз сарапшы жүргізетін жобаны бағалау және талдау;

14) тәуелсіз сарапшы – жобаға тәуелсіз сараптама жүргізу бойынша қызметтер көрсететін және белгіленген біліктілік талаптарына сәйкес келетін заңды тұлға;

15) теріс ақпарат – заңсыз жолмен алынған кірістерді заңдастыру (жылыстату) жағдайларына қатыстылығы, терроризмді қаржыландыру және жаппай қырып-жоятын қаруды тарату жағдайларына қатысының болуы, банкроттықты тану рәсімдерінің немесе сот оңалту рәсімдерінің басталғаны, тарату процесінің басталғаны, қарастырылып отырған күнге мемлекеттің уәкілетті органдарының пруденциалдық және өзге де нормативтерін орындамау, санкциялық тізімдерде болу фактілерін қамтитын ақпарат;

16) техникалық тапсырма – сараптама тобы дайындаған және тәуелсіз сарапшының талдау мен сараптама жүргізуіне арналған сұрақтар тізбесін қамтитын құжат;

17) уәкілетті орган – жобаны іске асыру жоспарланатын мемлекеттік басқару саласына (аясына) басшылықты жүзеге асыратын орталық атқарушы орган.

4. Жобалардың сараптамасы екі кезеңде жүргізіледі:

1-кезең «Жобаны стратегиялық бағалау»;

2-кезең «Жобаны кешенді бағалау және қаржыландырудың балама көздерін қарау»;

«Жобаны индикативтік бағалау» міндетті кіші кезеңі;

«Тәуелсіз сараптамалардан өту» опциялық кіші кезеңі;

«Жобаны қаржыландырудың балама көздерін қарау және тарту» міндетті кіші кезеңі;

«Жобаны қорытынды бағалау» міндетті кіші кезеңі.

2-тарау. Жобаны стратегиялық бағалау

5. Жобаның бастамашысы осы Қағидаларға 2-қосымшадағы талаптарға сәйкес бизнес-жоспармен және жобаның қаржылық моделімен қоса уәкілетті органға қаржыландыру қажеттігі туралы сұраным жібереді.

6. Уәкілетті орган сұраным түскен күннен бастап 20 (жиырма) жұмыс күні ішінде осы Қағидаларға 3-қосымшаға сәйкес нысан бойынша жобаның стратегиялық негіздемесін (бұдан әрі – стратегиялық негіздеме) қалыптастырады және оны жобаның бастамашысы ұсынған құжаттармен қоса мемлекеттік жоспарлау жөніндегі орталық уәкілетті органға жібереді. Стратегиялық негіздемеге уәкілетті органның басшысы қол қояды.

7. Мемлекеттік жоспарлау жөніндегі орталық уәкілетті орган барлық құжаттарды алған күннен бастап 15 (он бес) жұмыс күні ішінде уәкілетті орган

ұсынған стратегиялық негіздеме мен ұсынылған құжаттар негізінде осы Қағидаларға 4-қосымшаға сәйкес нысан бойынша жобаны стратегиялық бағалау қорытындысын (бұдан әрі – стратегиялық бағалау қорытындысы) дайындайды. Жобаны стратегиялық бағалау осы Қағидаларға 5-қосымшада келтірілген жобаны стратегиялық бағалау алгоритміне (бұдан әрі – стратегиялық бағалау алгоритмі) сәйкес жүргізіледі. Стратегиялық бағалау қорытындысына мемлекеттік жоспарлау жөніндегі орталық уәкілетті органның басшысы қол қояды.

8. Стратегиялық бағалау нәтижелері бойынша мынадай түрдегі қорытындылар шығарылады:

- 1) оң;
- 2) пысықтау қажеттігі туралы;
- 3) теріс.

9. Егер стратегиялық бағалау алгоритміне сәйкес жобаны стратегиялық бағалау 7 (жеті) балл немесе одан көп болса және жоба жалпы өлшемшарттардың әрқайсысына сәйкес келсе, мемлекеттік жоспарлау жөніндегі орталық уәкілетті орган 3 (үш) жұмыс күні ішінде оң қорытынды беріп, уәкілетті органды хабардар етеді және жоба келесі кезеңге жіберіледі.

10. Қажетті құжаттар ұсынылмаған және (немесе) белгіленген талаптарға сәйкес келмейтін құжаттар ұсынылған және (немесе) стратегиялық негіздемеде толық әрі релевантты ақпарат болмаған кезде мемлекеттік жоспарлау жөніндегі орталық уәкілетті орган пысықтау қажеттігі туралы қорытынды береді және жоба уәкілетті органға пысықтауға жіберіледі.

11. Пысықтау стратегиялық бағалау қорытындысындағы ескертулер мен түсіндірмелерге сәйкес белгіленген талаптарға сәйкес келетін қажетті құжаттарды ұсынуды және (немесе) стратегиялық негіздемені өзгертуді және толықтыруды қамтиды.

Пысықтауды 2 (екі) реттен артық жасауға жол берілмейді. Әрбір пысықтауды уәкілетті орган 15 (он бес) жұмыс күні ішінде жүзеге асырады.

Мемлекеттік жоспарлау жөніндегі орталық уәкілетті орган 10 (он) жұмыс күні ішінде пысықталған жобаны қарап, жаңартылған стратегиялық бағалау қорытындысын дайындайды.

12. Осы Қағидалардың 9, 10 және 11-тармақтарында көрсетілген шарттарға сәйкес келмеген жағдайда мемлекеттік жоспарлау жөніндегі орталық уәкілетті орган 3 (үш) жұмыс күні ішінде теріс қорытынды беріп, уәкілетті органды хабардар етеді және жоба келесі кезеңге жіберілмейді.

3-тарау. Жобаны кешенді бағалау және қаржыландырудың балама көздерін қарау

1-параграф. «Жобаны индикативтік бағалау» міндетті кіші кезеңі

13. Уәкілетті орган жоба бастамашысының осы кезеңге өткені туралы хабарламаны алған күннен бастап 15 (он бес) жұмыс күні ішінде жоба бойынша құжаттар топтамасын сараптама тобына жібереді.

Құжаттар топтамасы мына құжаттарды қамтиды:

стратегиялық бағалау қорытындысы;

осы Қағидаларға 6-қосымшаға сәйкес нысан бойынша жоба бастамашысының сауалнамасы;

осы Қағидаларға 2-қосымшадағы талаптарға сәйкес жобаның бизнес-жоспары және қаржылық моделі;

осы Қағидаларға 7-қосымшаға сәйкес нысан бойынша қаржыландырудың балама көздерінің болмауы жөніндегі растайтын құжаттар (ұйымдардың ресми жауаптары немесе хаттары) қоса берілген ақпарат;

жобаны іске асырудың жоспар-графикі;

жобаны қаржыландырудың жоспар-графикі;

Pre-FEED және (немесе) FEED-құжаттама және (немесе) техникалық құжаттама бойынша жобаның ведомстводан тыс кешенді сараптамасының қорытындысы (бар болса);

міндетті түрде жобаның бастамашысы мен қарыз алушының соңғы 3 жылдағы қаржылық есептілігі (бар болса, аудиторлық есеппен бірге);

осы Қағидаларға 8-қосымшаға сәйкес нысан бойынша жоба бастамашысының кредиттік есепті беруге келісімі;

салық органынан салықтарды және бюджетке төленетін басқа да міндетті төлемдерді төлеу бойынша берешектің жоқ (бар) екендігі туралы анықтама;

жобаның тәуелсіз сараптамалары (бар болса);

жабдықтарды негізгі берушілердің және бас мердігермен (бар болса) қоса мердігерлердің ұсыныстары;

шикізатты және (немесе) көрсетілетін қызметтерді берушілермен және өнімдерді немесе көрсетілетін қызметтерді сатып алушылармен шарттардың жобалары немесе шарттар (бар болса);

жоба бастамашысының және (немесе) қарыз алушының бос ақша легінің болжамы және жоба бастамашысының және (немесе) қарыз алушының ағымдағы, жоспарланатын қарыздары бойынша ковенанттарды сақтауының жобаға қарыз сұралатын мерзімнен кем болмайтын мерзімге арналған болжамы.

14. Сараптама тобы үйлестіруші орган құжаттардың толық топтамасын алған күннен бастап 20 (жиырма) жұмыс күні ішінде осы Қағидаларға 9-қосымшаға сәйкес нысан бойынша индикативтік бағалау қорытындысын (бұдан әрі – индикативтік бағалау қорытындысы) жасайды және ескертулер мен ұсыныстар алу үшін сараптама тобының басқа қатысушыларына жібереді.

15. Сараптама тобының қатысушылары 10 (он) жұмыс күні ішінде индикативтік бағалау қорытындысының жобасын қарайды және сараптама тобын үйлестіруші органға ескертулер мен ұсыныстарды жібереді.

16. Сараптама тобын үйлестіруші орган 10 (он) жұмыс күні ішінде сараптама тобына қатысушылардан алынған ескертулер мен ұсыныстарды ескере отырып, индикативтік бағалау қорытындысына өзгерістер мен толықтырулар енгізеді.

Индикативтік бағалау қорытындысына сараптама тобына қатысушылардың бәрі қол қояды.

17. Индикативтік бағалау нәтижелері бойынша мынадай түрдегі қорытындылар шығарылады:

- 1) оң;
- 2) пысықтау қажеттігі туралы;
- 3) теріс.

18. Сараптама тобы индикативтік бағалау қорытындысының мынадай: құжаттар топтамасының толықтығы туралы;

Тұжырымдаманың 5-бөлімінің 5.3-тармағында бекітілген қаржыландыру қағидалары мен шарттарына сәйкестігі туралы;

жобаның бастамашысына (оның ішінде оның жетекшісіне, қатысушыларына немесе акционерлеріне, бенефициарларына) және қарыз алушыға (оның ішінде оның басшысына, қатысушыларына немесе акционерлеріне, бенефициарларына) қатысты анықталған теріс ақпараттың болмауы туралы;

жобаның бастамашысы мен қарыз алушының кредит қабілеттілігі туралы;

жобаны ҚРҰҚ қаражаты есебінен қаржыландырудың мүмкіндігі туралы;

жобаның осы Қағидаларға 10-қосымшаға сәйкес жеткілікті пысықталғаны (бұдан әрі – жобаның пысықталуын бағалау алгоритмі) туралы;

индикативтік бағалау қорытындысында көрсетілген жобаның инвестициялық тиімділігі мен тартымдылығының шекті мәндеріне сәйкестігі туралы тармақтарын тексеру мен бағалау нәтижесі оң болған кезде оң қорытынды береді және жоба «Жобаны қаржыландырудың балама көздерін қарау және тарту» кіші кезеңіне жіберіледі.

19. Егер индикативтік бағалау қорытындысында тәуелсіз сараптамаларды сұрату қажеттігі көрсетілген жағдайда «Жобаны қаржыландырудың балама көздерін қарау және тарту» кіші кезеңіне өткенге дейін сараптама тобы жобаны осы Қағидалардың 3-тарауының 3-тармағына сәйкес «Тәуелсіз сараптамалардан өту» опциялық кіші кезеңіне жібере алады.

20. Индикативтік бағалау қорытындысына тәуелсіз сараптамаларды сұрату қажеттігі туралы пікірді қосу үшін сараптама тобына қатысушылардың бірінің тиісті пікірінің болуы жеткілікті.

21. Сараптама тобы мынадай:

толық емес және (немесе) талаптарға сәйкес келмейтін құжаттар топтамасы ұсынылған;

жоба Тұжырымдаманың 5-бөлімінің 5.3-тармағында бекітілген қаржыландыру қағидалары мен шарттарына сәйкес келмеген;

жобаның пысықталуын бағалау алгоритміне сәйкес жоба жеткілікті пысықталмаған;

индикативтік бағалау қорытындысында көрсетілген жобаның инвестициялық тиімділігі мен тартымдылығының шекті мәндеріне сәйкес келмеген жағдайларда пысықтау қажеттігі туралы қорытынды береді және жоба жобаның бастамашысына пысықтауға жіберіледі.

22. Пысықтау толық әрі белгіленген талаптарға сәйкес келетін құжаттар топтамасын ұсынуды және (немесе) индикативтік бағалау қорытындысындағы ескертулер мен түсіндірмелерге сәйкес жобаны пысықтауды қамтиды.

Пысықтауды 2 (екі) реттен артық жасауға жол берілмейді. Әрбір пысықтауды жобаның бастамашысы 30 (отыз) жұмыс күні ішінде жүзеге асырады.

Сараптама тобы пысықталған жобаны қарайды және осы Қағидалардың 13, 14, 15, 16, 17, 18, 19, 20, 21, 22, 23 және 24-тармақтарында көзделген тәртіппен және мерзімдерде жаңартылған индикативтік бағалау қорытындысын дайындайды.

23. Сараптама тобы осы Қағидалардың 18, 19, 20, 21 және 22-тармақтарында көрсетілген шарттарға сәйкес келмеген жағдайда теріс қорытынды береді және жоба келесі кіші кезеңге жіберілмейді.

24. Индикативтік бағалау қорытындысын дайындау кезінде сараптама тобы қатысушылардың позицияларында қайшылықтар немесе өзге де даулы мәселелер туындаған жағдайда бұл мәселелерді сараптама тобына қатысушылар 3-тараудың 1-параграфында көзделген индикативтік бағалау қорытындысын дайындаудың жалпы мерзімі шеңберінде реттеуге тиіс.

Оң қорытынды беру бойынша келісілген позицияға қол жеткізілмесе, сараптама тобы теріс қорытынды беру туралы шешім қабылдайды, бұл жобаны одан әрі қараудан және оны келесі кезеңдерге өткізуден бас тартуға әкеп соғады.

2-параграф. «Тәуелсіз сараптамалардан өту» опциялық кіші кезеңі

25. Жобаның ерекшеліктеріне және тәуелсіз сараптамаға жататын мәселелерге байланысты тәуелсіз сараптаманың мынадай:

- 1) коммерциялық (маркетингтік) мәселелер;
- 2) құқықтық мәселелер;
- 3) техникалық мәселелер бойынша түрлері ажыратылады.

26. Егер индикативтік бағалау қорытындысында тәуелсіз сараптаманың қажеттігі туралы пікір білдірілсе, сараптама тобын үйлестіруші орган 10 (он) жұмыс күні ішінде техникалық тапсырманың жобасын әзірлеп, оны ескертулер мен ұсыныстар алу үшін сараптама тобына басқа қатысушыларға жібереді.

27. Сараптама тобына қатысушылар 7 (жеті) жұмыс күні ішінде сараптама тобын үйлестіруші органға техникалық тапсырманың жобасына ескертулер мен ұсыныстар береді.

Сараптама тобын үйлестіруші орган 5 (бес) жұмыс күні ішінде сараптама тобына басқа қатысушылардан алынған ескертулер мен ұсыныстарды ескере отырып, техникалық тапсырманың жобасына өзгерістер мен толықтырулар

енгізеді.

Тәуелсіз сараптаманың техникалық тапсырмасына сараптама тобына қатысушылардың бәрі қол қояды және ол жобаның бастамашысына және (немесе) уәкілетті органға ұсынылады.

Техникалық тапсырма әрбір жоба үшін жеке-жеке жасалады.

28. Тәуелсіз сараптамаларды сұратуға мынадай мән-жайлар негіз болып табылады:

1) коммерциялық (маркетингтік) мәселелер бойынша тәуелсіз сараптаманы сұрату үшін – сараптама тобы анықтаған айтарлықтай коммерциялық тәуекелдердің болуы және (немесе) экономикалық және коммерциялық сипаттағы жоба саласында арнайы білім мен құзыреттің қажет болуы;

2) құқықтық мәселелер бойынша тәуелсіз сараптаманы сұрату үшін – сараптама тобы анықтаған айтарлықтай институционалдық, құқықтық тәуекелдердің болуы және (немесе) құқықтық сипаттағы жоба саласында арнайы білім мен құзыреттің қажет болуы;

3) техникалық мәселелер бойынша тәуелсіз сараптаманы сұрату үшін – сараптама тобы анықтаған айтарлықтай техникалық тәуекелдердің болуы және (немесе) техникалық сипаттағы жоба саласында арнайы білім мен құзыреттің қажет болуы.

29. Жобаның бастамашысы Қазақстан Республикасының Ұлттық Банкі басқармасының шешімімен бекітілген біліктілік талаптарын (бұдан әрі – біліктілік талаптары) ескере отырып, тәуелсіз сарапшыны іздеуді және тартуды өз бетінше және өз қаражаты есебінен жүзеге асырады. Бұл ретте іздеу 30 (отыз) жұмыс күні ішінде жүзеге асырылады.

30. Тәуелсіз сарапшыны сұратылған тәуелсіз сараптама бойынша қызметтер көрсетуге жіберуді сараптама тобын үйлестіруші орган әлеуетті тәуелсіз сарапшының біліктілік талаптарға толық сәйкестігі негізінде жүзеге асырады.

31. Жобаның бастамашысы сараптама тобын үйлестіруші органға біліктілік талаптарына сәйкес қажетті құжаттармен қоса әлеуетті тәуелсіз сарапшыны тексеру қажеттігі туралы сұраным жібереді.

32. Сараптама тобын үйлестіруші орган ұсынылған құжаттар негізінде барлық құжаттарды алған күннен бастап 15 (он бес) жұмыс күні ішінде осы Қағидаларға 11-қосымшаға сәйкес нысан бойынша әлеуетті тәуелсіз сарапшының біліктілік талаптарына сәйкестігі тұрғысынан тексерілгені туралы қорытынды (бұдан әрі – әлеуетті тәуелсіз сарапшыны тексеру туралы қорытынды) дайындайды және оны жобаның бастамашысына және (немесе) уәкілетті органға жібереді.

Әлеуетті тәуелсіз сарапшыны біліктілік талаптарына сәйкестігі тұрғысынан тексеру барысында сараптама тобын үйлестіруші орган сараптама тобын басқа қатысушылардан пікір, ақпарат және тұжырымдар сұратуға құқылы.

33. Әлеуетті тәуелсіз сарапшының ұсынылған құжаттары бойынша анықталған сәйкессіздіктер мен ескертулерді белгілеген мерзімдерде жою мақсатында оларды сараптама тобын үйлестіруші орган жоба бастамашысының назарына жеткізеді.

34. Әлеуетті тәуелсіз сарапшы біліктілік талаптарына сәйкес келмеген жағдайда жобаның бастамашысы біліктілік талаптарын ескере отырып, 20 (жиырма) жұмыс күні ішінде жаңа әлеуетті тәуелсіз сарапшыны іздеуді жүзеге асырады.

35. Тәуелсіз сараптама нәтижелерін жобаның бастамашысы сараптама тобына есеп түрінде жібереді және сараптама тобы оны «Жобаны қорытынды бағалау» кіші кезеңінде қарайды.

Тәуелсіз сарапшының есебі техникалық тапсырмаға сәйкес жасалуға тиіс. Тәуелсіз сарапшының есебі бойынша сараптама тобы анықтаған ескертулерді сараптама тобының белгілеген мерзімдерде жоюы мақсатында жаңартылған немесе қосымша есепті дайындауды қоса алғанда, сараптама тобын үйлестіруші орган оларды жоба бастамашысының назарына жеткізеді.

3-параграф. «Жобаны қаржыландырудың балама көздерін қарау және тарту» міндетті кіші кезеңі

36. Жобаның бастамашысы сараптама тобымен бірлесіп индикативтік бағалау қорытындысында көрсетілген ұсынымдарды ескере отырып, жобаны қаржыландырудың балама көздерін қарауды 45 (қырық бес) жұмыс күні ішінде жүзеге асырады.

37. Қаржыландырудың балама көздері жоба бастамашысының меншікті қаражатын, жобаның бастамашысы қатысушыларының немесе акционерлерінің, Қазақстан Республикасының екінші деңгейдегі банктерінің, шетелдік коммерциялық банктердің, халықаралық қаржы ұйымдарының, экспорттық-кредиттік агенттіктердің, квазимемлекеттік ұйымдардың, мемлекеттік немесе бюджеттік көздердің меншікті қаражатын қамтуы мүмкін (бірақ олармен шектелмейді).

38. Қаржыландыру көздерін қарау сұраным (өтінім) жіберуді, инвесторлармен және кредиторлармен талқылауды, жауаптарды жинау мен өңдеуді білдіреді.

39. Сараптама тобының қаржыландыру көздерін қарауға қатысуы әлеуетті инвесторлар мен кредиторларға сұраным (өтінім) жасау кезіндегі консультациялық көмекті, сұранымдарды (өтінімдерді) жіберуге қатысуды, инвесторлармен және кредиторлармен талқылауға қатысуды, сондай-ақ жауаптарды өңдеудегі консультациялық көмекті білдіруі мүмкін.

40. Қаржыландыру көздерін қарау нәтижелерін сараптама тобы «Жобаны қорытынды бағалау» кіші кезеңінде ескереді.

4-параграф. «Жобаны қорытынды бағалау» міндетті кіші кезеңі

41. Сараптама тобын үйлестіруші орган осы Қағидалардың 2-тарауында және 3-тарауының 1, 2 және 3-параграфтарында көрсетілген кезеңдер мен кіші кезеңдер барысында алынған құжаттар топтамасы мен ақпараттың, сондай-ақ өз сұратуы бойынша өзге де құжаттардың негізінде оларды алған күннен бастап 20 (жиырма) жұмыс күні ішінде осы Қағидаларға 12-қосымшаға сәйкес нысан бойынша қорытынды бағалау қорытындысын (бұдан әрі – қорытынды бағалау қорытындысы) жасайды және ескертулер мен ұсыныстар алу үшін сараптама тобына басқа қатысушыларға жібереді.

42. Сараптама тобына қатысушылар 15 (он бес) жұмыс күні ішінде қорытынды бағалау қорытындысының жобасын қарайды және сараптама тобын үйлестіруші органға ескертулер мен ұсыныстар жібереді.

43. Сараптама тобын үйлестіруші орган 15 (он бес) жұмыс күні ішінде сараптама тобына басқа қатысушылардан алынған ескертулер мен ұсыныстарды ескере отырып, қорытынды бағалау қорытындысының жобасына өзгерістер мен толықтырулар енгізеді.

Қорытынды бағалау қорытындысына сараптама тобына қатысушылардың бәрі қол қояды.

44. Қорытынды бағалау қорытындысы оң немесе теріс болуы мүмкін.

45. Сараптама тобы мынадай шарттар сақталған жағдайда оң қорытынды береді және жоба ҰҚБК қарауына жіберіледі:

жобаның бастамашысы мен қарыз алушының кредит қабілеттілігін тексерудің оң нәтижесі;

жобаның пысықталуын бағалау алгоритміне сәйкес жобаның жеткілікті пысықталуы;

жобаның қорытынды бағалау қорытындысында көрсетілген инвестициялық тиімділік пен тартымдылықтың шекті мәндеріне сәйкестігі;

ҚРҰҚ-ны толық көлемде алмастыруға мүмкіндік беретін балама қаржыландыру көздерінің болмауы;

жобаның іске асырылуы мен өміршеңдігіне қауіп төндіретін құқықтық, институционалдық, ұйымдастырушылық, коммерциялық, техникалық, экологиялық және қаржылық тәуекелдер мен шектеулердің болмауы;

жобаны қаржыландырудың құрылымы мен шарттарының айқындалуы.

46. Жобаны қаржыландыру шарттарын айқындау кезінде сараптама тобы Тұжырымдаманың 5-бөлімінің 5.3-тармағында белгіленген қаржыландыру қағидалары мен шарттарын басшылыққа алуға міндетті.

47. Сараптама тобы осы Қағидалардың 45-тармағында көрсетілген шарттарға сәйкес келмеген жағдайларда теріс қорытынды береді және жоба ҰҚБК қарауына жіберілмейді.

48. Қорытынды бағалау қорытындысын дайындаған кезде сараптама тобына қатысушылардың позицияларында қайшылықтар немесе өзге де даулы мәселелер туындаған жағдайда бұл мәселелерді сараптама тобына қатысушылар осы

Қағидалардың 41, 42 және 43-тармақтарында көзделген қорытынды бағалау қорытындысын дайындаудың жалпы мерзімі шеңберінде реттеуге тиіс.

Оң қорытынды беру бойынша келісілген позицияға қол жеткізілмесе, сараптама тобы теріс қорытынды беру туралы шешім қабылдайды, бұл жобаны одан әрі қараудан бас тартуға әкеп соғады.

4-тарау. Сараптама нәтижелерін қарау және жобаны қаржыландыру

49. Қорытынды бағалау қорытындысы оң болған жағдайда уәкілетті орган жобаны қаржыландыру жөніндегі мәселені ҰҚБК қарауына шығару үшін қажетті рәсімдерді жүзеге асырады.

50. ҰҚБК қорытынды бағалау қорытындысында көрсетілген қаржыландыру шарттарын бекіту туралы ұсыным берген жағдайда уәкілетті орган қажет болған кезде Қазақстан Республикасы Президентінің келісімін алу үшін қажетті рәсімдерді жүзеге асырады.

51. ҰҚБК жобаны қаржыландырудан бас тарту туралы ұсыным берген жағдайда уәкілетті орган бұл туралы жобаның бастамашысын және (немесе) сараптама тобын 3 (үш) жұмыс күні ішінде хабардар етеді.

52. Борыштық бағалы қағаздарды сатып алу арқылы жобаны ҚРҰБ-дан қаржыландыру осы Қағидалардың 53, 54, 55, 56, 57, 58, 59, 60 және 61-тармақтарына сәйкес кезең-кезеңімен жүзеге асырылады, бұл ретте жобаны қаржыландырудың екінші және кейінгі кезеңдерін қаржыландыру осы Қағидалардың 5-тарауына сәйкес жобаның бақылау нүктелерін талдау нәтижелері негізінде жүзеге асырылады.

53. Бақылау нүктесі мен қаржыландырудың келесі кезеңі арасындағы мерзім талдау жүргізу мақсатында кемінде 25 (жиырма бес) жұмыс күнін құрауға тиіс.

54. Жобаның бақылау нүктелерін талдау нәтижесі оң болған жағдайда жобаны қаржыландыру жалғасады. Оң нәтиже деп мына екі шарттың сақталуы түсініледі:

1) қаржыландырудың алдыңғы кезеңінде бөлінген соманың кемінде 70 % мөлшерінде игерілуі;

2) жобаның бақылау нүктесінде жобаны іске асыру бойынша іс жүзіндегі көрсеткіштер мәнінің жоспарлы көрсеткіштерден 70 %-дан кем болмауы.

55. Жобаның бақылау нүктелерін талдау нәтижесі теріс болған жағдайда сараптама тобы осы Қағидалардың 56-тармағында белгіленген тәртіппен:

жобаны қаржыландыруды жалғастыру туралы;

анықталған проблемалар және (немесе) ескертулер жойылғанға дейін жобаны қаржыландыруды тоқтата тұру туралы;

жобаны қаржыландыруды тоқтату туралы ұсыным жасайды.

56. Сараптама тобын үйлестіруші орган 15 (он бес) жұмыс күні ішінде ұсынымның жобасын әзірлейді және ескертулер мен ұсыныстар беру үшін сараптама тобына басқа қатысушыларға жібереді.

Сараптама тобына қатысушылар сараптама тобын үйлестіруші органға өз ескертулері мен ұсыныстарын 10 (он) жұмыс күні ішінде береді.

Сараптама тобын үйлестіруші орган ескертулер мен ұсыныстарды алғаннан кейін 10 (он) жұмыс күні ішінде ұсынымның жобасына тиісті өзгерістер мен толықтырулар енгізеді, сараптама тобына барлық қатысушылардың қолтаңбаларын жинауды ұйымдастырады және уәкілетті органға және (немесе) жобаның бастамашысына жібереді.

57. Жоба бастамашысының анықталған проблемаларды және (немесе) ескертулерді жойғаны туралы ақпарат түскен жағдайда сараптама тобы осы Қағидалардың 56-тармағында белгіленген тәртіппен:

қаржыландырудың бұрынғы шарттарын сақтай отырып немесе жаңаларын белгілей отырып, жобаны қаржыландыруды жалғастыру немесе қайта бастау туралы;

жобаны қаржыландыруды тоқтату туралы ұсыным жасайды.

58. Сараптама тобы жобаны жаңа шарттармен қаржыландыруды қайта бастауға не қаржыландыруды тоқтатуға ұсыным берген жағдайда уәкілетті орган тиісті мәселелерді ҰҚБК-ның және Қазақстан Республикасы Президентінің қарауына шығару үшін қажетті рәсімдерді жүргізеді.

59. Қарыз алушы қаржыландырудың белгіленген шарттарын сақтамаған жағдайда шешімдерді сараптама тобы қабылдайды.

5-тарау. Жобаның бақылау нүктелерін талдау, сондай-ақ жобаның стратегиялық мақсаттары мен әлеуметтік-экономикалық көрсеткіштеріне қол жеткізілуін талдау

60. Уәкілетті орган жобаның әрбір бақылау нүктесінен кейін 10 (он) жұмыс күні ішінде осы Қағидаларға 13-қосымшадағы тиісті жолдарды толтырып, бөлінген қаржыландырудың игерілуі және жоспарлы көрсеткіштерге қол жеткізу жөніндегі ақпаратты сараптама тобына ұсынады.

61. Сараптама тобын үйлестіруші орган бөлінген қаржыландырудың игерілуі және жоспарлы көрсеткіштерге қол жеткізу жөніндегі ақпаратты алғаннан кейін 15 (он бес) жұмыс күні ішінде осы Қағидаларға 13-қосымшадағы қажетті жолдарды толтырады және сараптама тобына барлық қатысушылардың қолтаңбаларын жинауды ұйымдастырады.

62. Уәкілетті орган жоба іске асырылғаннан кейін 1 (бір) тоқсан ішінде және жобаны пайдалану мерзімі аяқталғанға дейін әрбір келесі жылдың 1 маусымына дейін осы Қағидаларға 14-қосымшаны толтырып, жобаның жоспарлы стратегиялық мақсаттары мен әлеуметтік-экономикалық көрсеткіштеріне қол жеткізу жөніндегі ақпаратты сараптама тобына ұсынады.

63. Жобаның бақылау нүктелерін талдау, сондай-ақ жобаның стратегиялық мақсаттары мен әлеуметтік-экономикалық көрсеткіштеріне қол жеткізу нәтижелері ҚРҰБ-дан бөлінген қаражаттың жұмсалуды мониторингтеу жөніндегі комиссияға жіберіледі.
